

քաղաքական այդ պատասպմանց մէջ նիւթական շահ, միտքի ու մարմինի պարզ խաղաղութիւն, առտնին ու քաղաքային կեանքի անխռով դիւրութիւն, և որ ամէնէն չքնաղն է՝ առողջութիւն հոգիի ու մարմնի: « Երանի՛ երկրագործաց՝ եթէ գիտեն ու գիտնան իրենց բարեբաղդութիւնը »:

Երանի՛ նաև մեզի՛ եթէ մեր կարգին քիչ շատ փորձառութեամբ և տեսականով՝ կրքցանք քանի մը բարի թելադրութիւններ ներշնչել մեր թուրքահայ ժիր ու ազնիւ գործի մարդոց՝ տալէ ետքն իրենց նախորդաց վրայ պատմական այս երկտասնեակ գլուխները, որոց մէջ ջանացինք գլխաւորապէս անկեղծ քան շողոքորթող ըլլալ՝ մեր ծանօթութեանց անձուկ հայեակէն:

Մենք գրեցինք՝ թերևս շատերու համար կծու և անհաճոյ այլ ճշմարիտ ու գործնական հաշուելին և հետևելին. մեր գիտցածներէն և փորձառու ջոջերու թելադրածներէն ու հանրական օգտասիրութենէ՝ հարկադրեցանք ընել այսպէս: Իցի՛ւ թէ ուրիշներու առաւելութիւններն ու սխալները մատնացոյց ընելու ատեն՝ մենք քիչ սխալած ըլլայինք:

Սխալիլը մարդկայի՛ն է, բայց իր մարդ ըլլալը գիտցո՛ղը միայն կըրնայ ընել այս պարզ խոստովանութիւնն և ուղղել իր սխալները. մենք ի հարկին պատրաստ ենք ուղղել մերինները՝ մաղթելով որ մեր ընթերցող գործի մարդիկ ալ նոյնն ընէին իրենց կամայ ակամայ սխալներուն համար, և ասո՛վ երկուստեք կը շահինք խաղաղութեան մը, որ է դուռն երջանկութեան և ճշմարիտ ԱԶԱՏՈՒԹԵԱՆ: